

Bosna i Hercegovina
Federacija Bosne i Hercegovine
Tuzlanski kanton
Grad Tuzla
Služba za geodetske i imovinsko-pravne poslove

Na osnovu odredbi članova 22. stav (2) i 363. stav (1) Zakona o stvarnim pravima („Službene novine Federacije BiH“, broj 66/13 i 100/13), članova 13. i 35. Zakona o principima lokalne samouprave („Službene novine Federacije BiH“, broj 49/06 i 51/09), člana 6. Pravilnika o postupku javnog konkursa za raspolaganje nekretninama u vlasništvu Federacije Bosne i Hercegovine, kantona, općina i gradova („Službene novine Federacije BiH“, broj 17/14), članova 20., 21., 22. i 23. Odluke o uvjetima i načinu pribavljanja i raspolaganja nekretninama u vlasništvu Grada Tuzla („Službeni glasnik Grada Tuzla“, broj: 5/19, 6/19 i 4/21), te člana 3. stav (2) Odluke o opterećenju zemljišta pravom građenja na lokalitetu Poslovne zone „Kreka Sjever“ u Tuzli putem javnog nadmetanja – licitacije ("Službeni glasnik Grada Tuzla", broj 4/22), Služba za geodetske i imovinsko-pravne poslove raspisuje:

JAVNI OGLAS
o opterećenju zemljišta pravom građenja
na lokalitetu Poslovne zone „Kreka Sjever“ u Tuzli
putem javnog nadmetanja – licitacije

1. PREDMET JAVNOG OGLASA

Predmet Javnog oglasa je osnivanje prava građenja na nekretninama u vlasništvu Grada Tuzle na lokalitetu Poslovne zone „Kreka Sjever“ u Tuzli, definisanih Odlukom o provođenju Regulacionog plana poslovne zone "Kreka Sjever" u Tuzli ("Službeni glasnik Općine Tuzla", broj 10/14 i „Službeni glasnik Grada Tuzla“, broj 4/21), sa početnim iznosom naknade za osnivanje prava građenja, kako slijedi:

Redni broj	Broj poslovnog kompleksa označenog u regulacionom planu	Broj katastarske čestice po novom premjeru	Broj katastarske čestice po starom premjeru	Površina parcele	Horizontalni i vertikalni gabariti objekta	Početna tržišna cijena mjesečne zakupnine
1.	„17“	1460/1 KO Tuzla IV	2671/3 i 2672/3 KO SP Tuzla	3581 m ²	max. hor. gabariti 52,0 x 30,0 m max. visina objekta 12 m	31,47 KM (bez PDV-a) 36,81 KM (sa PDV-om)
2.	„18“	1464 KO Tuzla IV	1464 KO Tuzla IV	3673 m ²	max. hor. gabariti 47,0 x 20,0 m max. visina objekta 12 m	32,27 KM (bez PDV-a) 37,76 KM (sa PDV-om)
3.	„13“	1471/1, 1468/1, 1469/1, KO Tuzla IV	1471/1, 1468/1 i 1469/1, KO Tuzla IV	2893 m ²	max. hor. gabariti 46,0 x 22,0 m max. visina objekta 12 m	25,42 KM (bez PDV-a) 29,74 KM (sa PDV-om)

Izvođenje radova na formiranju poslovnih kompleksa iz tabelarnog pregleda, odnosno izgradnja poslovnih objekata poslovno – privredne djelatnosti sa pripadajućim vanjskim uređenjem mora se izvršiti u svemu prema odgovarajućem rješenju o načelnoj urbanističkoj saglasnosti izdatom od strane Službe za prostorno uređenje i zaštitu okoline Grada Tuzle.

2. USLOVI ZA OSTVARIVANJE PRAVA GRAĐENJA

Uslov za ostvarivanje prava građenja na nekretninama je da se na istim grade poslovni objekti poslovno – privredne djelatnosti prema Odluci o klasifikaciji djelatnosti BiH 2010 (“Službeni glasnik BiH”, broj 47/10).

Djelatnost pojedinih poslovno – privrednih kompleksa - objekata u obuhvatu regulacionog plana, zavisiće od konkretnih zahtjeva potencijalnih investitora, što će se pojedinačno utvrđivati kroz izdavanje urbanističko - tehničke dokumentacije i saglasnosti od nadležnih institucija.

U obuhvatu regulaconog plana ne odobravaju se djelatnosti koje bi, po svojim tehnološkim karakteristikama i zahtjevima, mogle negativno uticati na postojeće djelatnosti, objekte i okolinu, niti je dozvoljena izgradnja kompleksa-objekata za djelatnost: skladišta roba (izuzev minimalnih skladišta materijala i roba koji su formirani u dijelu objekta, a u funkciji djelatnosti korisnika), pijace na otvorenom, objekti za djelatnost igara na sreću, ugostiteljski objekti (izuzev

kada su ovi objekti u sastavu postojećih poslovno-privrednih objekata), parking prostori za teretna i putnička motorna vozila, uključujući autobuse i kombi vozila, te radne mašine, betonare, pjeskare i slično.

Pored uslova građenja objekata poslovno – privredne djelatnosti, uslov za ostvarivanje prava građenja na predmetnim nekretninama je i broj zaposlenih, na način da na 100 m² bruto površine građevinske parcele na kojoj je planirana izgradnja poslovnog objekta bude otvoreno najmanje jedno radno mjesto.

3. PRAVO UČEŠĆA U POSTUPKU NADMETANJA – LICITACIJE

Pravo učešća u postupku javnog nadmetanja imaju sva domaća i strana fizička i pravna lica, kao i više takvih lica po osnovu ugovora o zajedničkoj gradnji.

Učesnici u postupku javnog nadmetanja dužni su na nekretninama graditi poslovne objekte poslovno – privredne djelatnosti za koje su registrovani i koje su prijavom na Javni oglas naznačili da će obavljati, o čemu su dužni, kao dokaz o registrovanoj djelatnosti, dostaviti rješenje o registrovanoj djelatnosti za fizička lica, odnosno aktuelni izvod iz sudskog registra za pravna lica.

Učesnici u postupku javnog nadmetanja – licitacije, mogu podnijeti više prijava za više nekretnina, ali pravo građenja mogu ostvariti samo na jednoj nekretnini.

Izuzetno, učesnici u postupku javnog nadmetanja – licitacije mogu ostvariti pravo na dvije nekretnine ako se radi o spajanju susjednih nekretnina, jer to zahtjeva poslovno – privredni proces.

4. NAČIN PODOŠENJA PRIJAVE I POTREBNA DOKUMENTACIJA

Prijava za učešće na javnom nadmetanju – licitaciji podnosi se u pisanom obliku i mora sadržavati sljedeće:

- ime i prezime registrovanog fizičkog lica, odnosno naziv pravnog lica,
- kontakt telefon,
- adresa registrovanog fizičkog lica, odnosno sjedište pravnog lica,
- oznaku nekretnine za koju se podnosi prijava (broj katastarske čestice po novom premjeru ili naznaka poslovnog kompleksa),
- naznaka djelatnosti koja će se obavljati u poslovnom objektu koji se namjerava izgraditi,
- potpis registrovanog fizičkog lica, odnosno potpis ovlaštenog lica u pravnom licu i pečat.

Učesnik javnog nadmetanja – licitacije uz prijavu je dužan dostaviti originalnu ili od nadležnog organa ovjerenu fotokopiju dokumentacije i to:

- rješenje o registrovanoj djelatnosti za registrovano fizičko lice, odnosno aktuelni izvod iz sudskog registra za pravno lice (ne starije od 90 dana od dana podnošenja prijave),
- važeću ličnu kartu registrovanog fizičkog lica (lica ovlaštenog za zastupanje registrovanog fizičkog lica), odnosno važeću ličnu kartu odgovornog lica u pravnom licu (lica ovlaštenog za zastupanje odgovornog lica u pravnom licu),
- dokaz o uplaćenim sredstvima na ime kapare u iznosu od 500,00 KM,
- dokaz prijave prebivališta (PBA-3 obrazac) za registrovano fizičko lice, odnosno odgovornog lica u pravnom licu,
- uvjerenje o poreznoj registraciji - ID broj poreznog obveznika,
- uvjerenje nadležne Porezne uprave o izmirenim dospjelim poreznim obavezama kao i izmirenim obavezama po osnovu PIO/MIO (ne starije od 30 dana od dana podnošenja prijave),
- uvjerenje o urednom izmirenju indirektnih poreza, izdato od Uprave za indirektno oporezivanje, ukoliko je prijavljeni učesnik obveznik plaćanja PDV-a, a za poslovne subjekte koji nisu u sistemu PDV-a dostavlja se uvjerenje od Uprave za indirektno oporezivanje da nisu u sistemu PDV-a (ne starije od 30 dana od dana podnošenja prijave),
- uvjerenje/izvještaj o otvorenim računima registrovanog pravnog subjekta izdat od strane Centralne banke BiH (ne starije od 30 dana od dana podnošenja prijave),
- pisanu izjavu registrovanog fizičkog lica, odnosno lica ovlaštenog za zastupanje pravnog lica, sačinjenu u **formi notarski obrađene isprave** i ne stariju od 30 dana od dana podnošenja prijave, kojom:
 - o Prihvata obavezu da će na nekretnini graditi poslovni objekat u kojem će obavljati registrovanu poslovno – privrednu djelatnost naznačenu u prijavi na Javni oglas.
 - o Prihvata obavezu da će, nakon pravosnažnosti rješenja o odobrenju za građenje pribavljenog od strane nadležne službe, započeti radove na objektu u roku od 12 mjeseci od dana pravosnažnosti rješenja o odobrenju za građenje,
 - o Prihvata obavezu da će, u roku ne dužem od šest mjeseci od dana tehničkog prijema objekta, na ime osnovanog prava građenja, otvoriti najmanje jedno radno mjesto na 100 m² bruto površine građevinske parcele na kojoj je planirana izgradnja poslovnog objekta poslovno – privredne djelatnosti,
- ugovor o zajedničkoj gradnji, ukoliko u postupku javnog nadmetanja učestvuje više registrovanih fizičkih odnosno pravnih lica.

5. KAPARA

Učesnici javnog nadmetanja – licitacije, dužni su uplatiti kaparu u iznosu od 500,00 KM, na depozitni račun Budžeta Grada Tuzla, broj 1321000185060197, vrsta prihoda 721121, budžetska organizacija 0401001.

Ukoliko učesnik javnog nadmetanja – licitacije podnese više prijava za više ponuđenih nekretnina, dužan je uplatiti kaparu u iznosu od 500,00 KM za svaku nekretninu na navedeni račun.

Uplaćena kapara se neće vratiti ukoliko učesnik javnog nadmetanja odustane od zaključenja ugovora o osnivanju prava građenja.

Učesniku javnog nadmetanja koji ne ostvari pravo na zasnivanje prava građenja, uplaćena kapara će se vratiti u roku od 15 dana od dana zaključenja postupka javnog nadmetanja.

6. KRITERIJI ZA IZBOR NAJPOVOLJNIJEG PONUDAČA

Osnovni kriterij za izbor najpovoljnijeg ponuđača je visina ponuđene mjesečne zakupnine.

7. ZAKLJUČIVANJE UGOVORA O OSNIVANJU PRAVA GRAĐENJA I UVOĐENJE NOSIOCA PRAVA GRAĐENJA U POSJED

Nakon provedene procedure javnog nadmetanja – licitacije, na osnovu zapisnika Komisije za provođenje javnog nadmetanja – licitacije, Gradsko vijeće će, na prijedlog Gradonačelnika i uz prethodno pribavljeno mišljenje Gradskog pravobranilaštva Tuzla, donijeti odluku o izboru najpovoljnijeg ponuđača sa kojim će se zaključiti ugovor o osnivanju prava građenja na nekretnini, u formi notarski obrađene isprave.

Ugovor o osnivanju prava građenja će se zaključiti u roku od 30 dana od dana donošenja odluke Gradskog vijeća o izboru napovoljnih ponuđača.

Nosilac prava građenja je dužan da prilikom zaključenja ugovora o osnivanju prava građenja, vlasniku zemljišta preda notarski obrađenu mjeničnu izjavu i bjanko trasiranu akceptiranu mjenicu (mjenica bez protesta) s tim da mjenični dužnik (trasat) može biti samo banka, kao sredstvo obezbjeđenja plaćanja zakupnine za vrijeme trajanja prava građenja, koje sredstvo će se dostaviti Službi za ekonomski razvoj, poduzetništvo i poljoprivredu Grada Tuzle.

Ugovor o osnivanju prava građenja, uz prethodno pribavljeno mišljenje na isti od strane Gradskog pravobranilaštva Tuzla, potpisuje Gradonačelnik Grada Tuzla ili osoba koju Gradonačelnik posebno opunomoći.

Troškove izrade i notarske obrade ugovora o osnivanju prava građenja, kao i pripadajućeg poreza na promet nepokretnosti, snosi nosilac prava građenja.

Nakon zaključenja o osnivanju prava građenja, nosilac prava građenja je u obavezi da isti provede u zemljišnoj knjizi te se od dana upisa prava građenja u zemljišnoj knjizi smatra da je isto i uspostavljeno i nakon čega će se nosilac prava građenja uvesti u posjed nekretnine na kojoj je to pravo građenja uspostavljeno, o čemu će se sastaviti zapisnik.

8. ROK ZA ZASNIVANJE PRAVA GRAĐENJA I USLOVI PRENOSA I OPTEREĆENJA USPOSTAVLJENOG PRAVA GRAĐENJA

Pravo građenja na nekretninama uspostavlja se na vremenski period od 40 godina, uz mogućnost sporazumnog produženja na rok ne duži od onog na koji je uspostavljeno.

Uspostavljeno pravo građenja može se prenositi na druge osobe i opteretiti.

Pravo građenja je otuđivo i nasljeđivo kao i druge nekretnine, ako nije drugačije određeno.

Pravo građenja može se opteretiti služnostima, stvarnim teretima i založnim pravom, zemljišnim dugom i na svaki drugi način koji je u skladu sa zakonom i koji nije suprotan pravnoj naravi toga prava.

Zgrada i pravo građenja čine neraskidivo pravno jedinstvo, pa se zajedno prenose, nasljeđuju i opterećuju.

9. NAČIN, USLOVI I ROK PLAĆANJA ZAKUPNINE

Nosilac prava građenja je dužan plaćati zakupninu mjesečno, po fakturi ispostavljenoj od strane Službe za ekonomski razvoj, poduzetništvo i poljoprivredu, do 5. u mjesecu za prethodni mjesec.

Obaveza plaćanja zakupnine teče od dana zaključenja ugovora o osnivanju prava građenja.

Uplaćena kapara se nosiocu prava građenja uračunava kao unaprijed plaćena zakupnina.

Iznos zakupnine se usklađuje jednom godišnje sa ostvarenom stopom godišnje inflacije ili deflacije, na način da se plaćena zakupnina iz prethodne godine uvećava ili smanjuje za ostvarenu stopu inflacije ili deflacije u toj godini, a korigovana zakupnina će se primjenjivati u tekućoj godini.

Ukoliko nosilac prava građenja kasni sa plaćanjem zakupnine dva mjeseca uzastopno, vlasnik nekretnine će aktivirati instrument obezbjeđenja plaćanja.

Ukoliko je kašnjenje sa plaćanjem zakupnine duže od tri mjeseca uzastopno, smatraće se da je nosilac prava građenja jednostrano raskinuo ugovor te će se donijeti odluka o ukidanju zasnovanog prava građenja.

U slučaju donošenja odluke o ukidanju zasnovanog prava građenja, vlasnik zemljišta, Grad Tuzla, nema obavezu obeštećenja nosioca prava građenja koji je na nekretnini, koja je bila predmet ugovora o osnivanju prava građenja, započeo ili izgradio objekat/objekte.

Grad Tuzla će u roku od 30 dana od dana donošenja odluke o ukidanju zasnovanog prava građenja, pozvati nositelja prava građenja da o svom trošku i riziku ukloni izgrađeni objekat/objekte ili dijelove objekta/objekata.

10. OBAVEZE NOSIOCA PRAVA GRAĐENJA U VEZI SA PRIBAVLJANJEM NEOPHODNE DOKUMENTACIJE ZA GRAĐENJE I IZGRADNJU OBJEKTA I POSLJEDICE NEPOŠTOVANJA PROPISANIH ROKOVA

Nosilac prava građenja je u obavezi da u roku od petnaest (15) dana od dana zaključenja ugovora o osnivanju prava građenja od nadležne službe gradske uprave zatraži dopunu rješenja o načelnoj urbanističkoj saglasnosti sa svim potrebnim podacima koji su relevantni za odobravanje građenja.

U izuzetnim slučajevima, zbog opravdanih okolnosti koje nadležna služba cijeni u svakom konkretnom slučaju, rok za podnošenje zahtjeva za dopunu rješenja o načelnoj urbanističkoj saglasnosti može biti i duži, ali ne duži od 30 dana.

U slučaju protoka navedenih rokova, smatrat će se da je nosilac prava građenja jednostrano raskinuo zaključeni ugovor, u kojem slučaju će se donijeti odluka o ukidanju zasnovanog prava građenja.

Ukoliko nosilac prava građenja ne ispuni uslov koji se odnosi na vrstu objekta koji se može graditi ili ne ispuni uslov koji se odnosi na broj zaposlenih ili u postupku izdavanja urbanističke saglasnosti ne pribavi okolinsku dozvolu izdatu od strane nadležnog ministarstva za slučaj kada namjena građevine može imati značajan utjecaj na okolinu, smatrat će se da je nosilac prava građenja jednostrano raskinuo zaključeni ugovor, u kojem slučaju će se donijeti odluka o ukidanju zasnovanog prava građenja.

Nosilac prava građenja je u obavezi da nakon pravosnažnosti rješenja o odobrenju za građenje pribavljenog od strane nadležne službe, započne radove na objektu u roku od 12 mjeseci od dana pravosnažnosti rješenja o odobrenju za građenje, a u suprotnom mu prestaje važiti rješenje o odobrenju za građenje.

Važenje rješenja o odobrenju za građenje može se posebnim rješenjem, po zahtjevu nosioca prava građenja podnesenog najmanje 15 dana prije prestanka važenja tog odobrenja, produžiti za još jednu godinu ako se nisu promijenili uslovi prema kojima je izdano ranije odobrenje za građenje.

U slučaju prestanka važenja rješenja o odobrenju za građenje ili u slučaju da nosilac prava građenja ne podnese zahtjev za produženje rješenja o odobrenju za građenje u ostavljenom roku smatrat će se da je nosilac prava građenja jednostrano raskinuo zaključeni ugovor, u kojem slučaju će se donijeti odluka o ukidanju zasnovanog prava građenja.

Objekat čija je namjena utvrđena ugovorom o osnivanju prava građenja za koji je izdato odobrenje za građenje, smije se početi koristiti odnosno staviti u funkciju, tek nakon što nadležna služba za upravu izda dozvolu za njegovu upotrebu. Zabranjuje se nosiocu prava građenja da zagrijavanje prostorija izgrađenog poslovnog objekta vrši spaljivanjem štetnih i otrovnih nus proizvoda pri proizvodnji finalnog proizvoda svoje djelatnosti ili da zagrijavanje vrši fosilnim gorivima, a u suprotnom će se donijeti odluka o ukidanju zasnovanog prava građenja, a nosilac prava građenja se obavezuje da će po pozivu vlasnika zemljišta pristupiti zaključenju notarski obrađenog sporazumnog raskida zaključenog ugovora o osnivanju prava građenja.

Grad Tuzla će u roku od 30 dana od dana sporazumnog raskida ugovora, pozvati nosioca prava građenja da o svom trošku i riziku ukloni započeti i izgrađeni objekat/objekte ili dijelove objekta/objekata.

11. DAN I MJESTO ODRŽAVANJA JAVNOG NADMETANJA – LICITACIJE

Javno nadmetanje – licitacija će se održati u maloj Sali u zgradi gradske uprave Grada Tuzla (prizemlje), dana 30.05.2022. godine (ponedjeljak), sa početkom u 11:00 sati.

Javnom nadmetanju – licitaciji je dužan da prisustvuje podnosilac prijave ili lice koje ima punomoć za zastupanje podnosioca prijave za postupak javnog nadmetanja – licitacije (punomoć mora biti sačinjena u formi notarski obrađene isprave).

Javno nadmetanje - licitaciju provest će posebna komisija imenovana rješenjem Gradskog vijeća Tuzla.

Licitacija se može održati samo ako u njoj učestvuju najmanje dva učesnika.

Ako se na licitaciju javi samo jedan učesnik, Komisija može pristupiti postupku opterećenja pravom građenja nekretnine neposrednom pogodbom, pod uslovom da cijena mjesečne naknade (zakupnine) ne može biti niža od cijene iz tačke 1. Javnog poziva.

Ako se prva licitacija ne realizira uspješno, licitacija se ponavlja.

Ako se ni ponovljena licitacija ne realizira uspješno, smatra se da je javno nadmetanje bezuspješno, te u tom slučaju raspolaganje nekretninom opterećenjem pravom građenja može se izvršiti neposrednom pogodbom, pod uslovom da cijena mjesečne naknade (zakupnine) ne može biti niža od cijene iz tačke 1. Javnog poziva.

12. ROK ZA PODNOŠENJE PRIJAVE

Rok za dostavljanje prijave za javno nadmetanje – licitaciju je 15 dana od dana objavljivanja obavijesti o raspisivanju Javnog oglasa u dnevnom listu „Večernji list“, na oglasnoj ploči i web stranici Grada Tuzle. Ako Javni oglas ne bude objavljen istovremeno, kao rok objave računa se datum zadnje objave Javnog oglasa.

Prijave se naprijed navedenim dokazima se podnose na protokol u šalter sali Grada Tuzle ili putem preporučene poštanske pošiljke u zatvorenoj koverti na adresu:

GRAD TUZLA
ul. ZAVNOBiH-a broj 11
75 000 Tuzla

**Komisija za provođenje Javnog oglasa o opterećenju zemljišta pravom građenja
na lokalitetu Poslovne zone „Kreka Sjever“ u Tuzli
putem javnog nadmetanja – licitacije
(na ruke sekretara Komisije Razić Amira)
sa obaveznom naznakom broja katastarske čestice po novom premjeru ili
broja poslovnog kompleksa na koji se prijava odnosi
„NE OTVARAJ“**

Na poleđini koverta obavezno naznačiti ime i prezime, odnosno firmu, adresu i kontakt telefon.

Prijava se smatra nepotpunom ukoliko ne sadrži sve podatke predviđene oglasom.

Neblagovremene i nepotpune prijave se neće razmatrati, a uplaćeni depozit će se vratiti u roku od 15 dana od dana zaključenja postupka javnog nadmetanja.

Grad Tuzla ne snosi nikakve troškove ponuđača u postupku po ovom Javnom oglasu, te zadržava pravo da ovaj javni oglas poništi i objavi novi te ne snosi nikakvu odgovornost prema učesnicima postupka javnog nadmetanja – licitacije.

NAPOMENA: Ponuđači mogu svakim radnim danom u periodu od 8 do 12 sati u ul. ZAVNOBiH-a broj 11, u prostorijama Službe za prostorno uređenje i zaštitu okoline Grada Tuzle, u kancelariji broj 321 (broj telefona 035/307-471), izvršiti uvid u rješenja o načelnim urbanističkim saglasnostima, dok u prostorijama Službe za geodetske i imovinsko-pravne poslove, u kancelariji broj 122 (broj telefona 035/307-440), mogu izvršiti uvid u podatke o nekretninama koje su predmet licitacije, a razgledanje predmetnih parcela, najkasnije do isteka javnog nadmetanja – licitacije, zainteresovani mogu izvršiti na terenu u prisustvu službenog lica, uz prethodno utvrđivanje termina u kancelariji broj 24 (broj telefona 035/307-424).